

Terdapat 30 kesan lebam di seluruh badan termasuk di dahi dan badan

# Budak tiga tahun mati didera

Oleh FIRDAUS HASSAN  
firdaus.hassan@kosmo.com.my

**SERI KEMBANGAN** - Lagi kanak-kanak mati dipercayai didera.

Belum pun reda kisah Syafiah Humairah, 3, meninggal dunia akibat didera teman lelaki ibunya di Ulu Yam Lama, Batang Kali, Selangor pada 26 Februari lalu dan K. Hareswarral, berusia setahun enam bulan mati didera suami pengasuhnya di Pangsapuri Seri Ara Damansara, Petaling Jaya pada 6 Mac lalu, seorang lagi kanak-kanak mati dipercayai didera semalam.

Kali ini melibatkan seorang kanak-kanak perempuan Jasmine Lee@ Lee Swee Hui, 3, dipercayai didera seorang lelaki sejak seminggu lalu.

Ia terbongkar apabila lelaki berusia 27 tahun membawanya ke Poliklinik Komuniti Seri Kembangan di sini dalam keadaan tidak berdaya pada pukul 7.45 pagi semalam.

Lelaki itu membawa mangsa ke klinik tersebut berkemungkinan menyangka dia masih hidup.

Timbalan Ketua Jabatan Siasatan Jenayah Selangor, Asisten Komisioner Khaw Kok Chin berkata, hasil pemeriksaan pihak klinik mendapati kanak-kanak malang tersebut telah mati kira-kira dua jam sebelum itu dan terdapat 30 kesan lebam di seluruh tubuhnya termasuk di dahi dan badan.

Katanya, polis yang dimaklum-



JASMINE LEE@ LEE SWEE HUI

kan mengenai perkara itu oleh pihak klinik kemudian bergegas ke tempat kejadian dan menahan suspek yang merupakan bekas mekanik bagi membantu siasatan.

"Hasil pemeriksaan awal juga menunjukkan tiada tanda-tanda penderaan seksual ditemui pada tubuh mangsa.

"Kita percaya, kesan penderaan itu dilakukan sejak seminggu lalu dan tidak menolak kemungkinan



RUMAH kanak-kanak yang mati dipercayai mangsa dera di Taman Bukit Serdang, Seri Kembangan.



DUA suspek kes kematian Swee Hui.

mangsa dipukul menggunakan sesuatu objek," katanya ketika ditemui di sini semalam.

Menurut Kok Chin, pihaknya tu-

rut menahan seorang wanita berusia 24 tahun di Pangsapuri Bayu, Taman Bukit Serdang di sini pada pukul 12.45 tengah hari bagi membantu siasatan.

Katanya, kes itu disiasat di bawah

Seksyen 302, Kanun Keseksaan kerana membunuh dan mayat mangsa di bawa ke Hospital Serdang untuk dibedah siasat.

## Info Kes dera kanak-kanak

■ **25 MAC 2008** Seorang bayi perempuan berusia satu tahun meninggal dunia semasa dikejarkan ke Hospital Tengku Ampuan Afzan (HTAA), Kuantan dipercayai akibat didera oleh ibu muda dan teman lelakinya. Kanak-kanak dari Felda Bukit Goh, Kuantan itu didapati mempunyai kesan kecederaan dan lebam pada anggota badan serta dubur.

■ **28 DISEMBER 2008** Siwakorn Sukuntha, 8, seorang kanak-kanak warga Thailand ditemui mati di sebuah bilik di Tampoi, Johor Bahru.

■ **7 JANUARI 2009** Seorang kanak-kanak mengalami kecederaan fizikal di rumah ibunya di E-32, Tingkat 1, Taman Kok Doh, Segambut dipercayai akibat didera.

■ **26 FEBRUARI 2010** Syafiah Humairah yang baru berusia 3 tahun meninggal dunia akibat didera teman lelaki ibunya.

■ **5 MAC 2010** K. Hareswarral kanak-kanak berusia setahun enam bulan mati akibat didera oleh suami pengasuhnya di rumah mereka di Pangsapuri Seri Ara, Damansara.